

Mid-Day Dogri News Bulletin, 13th June 2024

समे – 12:25

<><><><><><>

PM-G7 Summit

प्रधानमंत्री नरेन्द्र मोदी होर कल जी-7 शिखर सम्मेलन च हिस्सा लैने लेई ईटली दे अपूलिया लेई अज्ज रवाना होआ करदे न। विदेश सचिव विनय कवात्रा होरें नमीं दिल्ली च समाचार माध्यमें गी जानकारी दिंदे होई आखेआ जे शुक्रवारें होने आले सम्मेलन लेई भारत गी इक आउटरीच मुख्खै दे तौर पर साददा दित्ता गोआ ऐ। लगातार त्री बारी औहदा संभालने मगरा प्रधानमंत्री हुंदी एह विदेश दी पैहली यात्रा ऐ। उनें आखेआ जे एह दौरा जी-7 शिखर सम्मेलन च मजूद दुनिया दे लीडरें कन्नै गल्लबात दा मौका थहोग।

<><><><><><>

Kuwait Fire Incident

विदेश मंत्रालय नै आखेआ ऐ जे कुवैत दे मागफ च मजूरें दी रिहायशआली थाहर अगग लगने आली घटना च तकरीबन 40एं भारतीयें दी मौत होई गई ऐ ते 50 जनें घायल होई गे न। राष्ट्रपति दफतर कुवैत दे मुत्तलका प्रशासन ते कंपनी कोला पूरा ब्यौरा लै करदा ऐ। मंत्रालय नै आखेआ ऐ जे घायलें गी 5एं सरकारी अस्पतालें च दाखल कराया गेदा ऐ। उंदा लोडचदा इलाज कीता जा करदा ऐ। अस्पताल दे मताबक घायलें च मते सारें दी हालत स्थिर ऐ। घटना दे मगरा कुवैत च भारत दे राजदूत आदर्श सवायकाहोर तुरत घटना आली थाहर पुज्जी गे। उनें भारतीय नागरिकें दी भलाई लेई अस्पतालें दा बी दौरा लाया। भारतीय राजदूती दफतर नै लगातार मकामी प्रशासन कन्नै राबता बनाए दा ऐ।

<><><><><><>

1st Parliament Session

18मीं लोकसभा दा पैहला सत्र 24 जून थमां लेइयै 3 जुलाई तगर चलोग, जेहदे च नमें चुने गेदे सदस्यें ते स्पीकर दी शपथ ते राष्ट्रपति हुंदा संबोधन ते गल्लबात बी होग। एह जानकारी केन्द्रीय संसदीय मामलें दे मंत्री किरण रिजिजू होरें बुधवार गी सांझा कीती। राज्यसभा दा बी 264मां इजलास 27 जून गी शुरू होइयै 3 जुलाई गी खत्म होग।

राष्ट्रपति द्रौपदी मुर्मू होर 27 जून गी राज्यसभा ते लोकसभा दी किट्ठी बैठक रक्खगंन। लोकसभा दा 17मां ते खीरी इजलास दी 31 जनवरी थमां लेइयै 10 फरवरी 2024 तोड़ी चलेआ। एह इजलास बजट सरबंधी हा। लोकसभा दियां कुल 274 बैठकां होइयां जिंदे च 202 बिल औंदे गे ते कुल 222 बिल पास कीते गे। तोआई राज्यसभा दियां कुल 271 बैठकां होइयां जिंदे च 31 बिल औंदे गे ते कुल 220 बिल पास होए। 17मीं लोकसभा इजलास च दौनें सदनें च पास होए दे बिले च कुल 221 बिल गी तोड़ चाढ़ेआ गेआ यानि ओह एक्ट बने। इंदे च 3 बिल ऐसे हे जिंदे करी कनूनी इंसाफ प्रक्रिया व ऐतिहासक मोड़ दित्ता, इंदे च भारतीय न्यास सनहिता 2023, भारतीय नागरिक सुरक्षा सनहिता 2023 ते भारतीय सकराय बिल 2023 शामिल हे। एह बिल इंडियन पैनल कोड 1860, द कोड ऑफ क्रिमिनल प्रोसीजर 1973 ते द इंडियन एवीडेंस एक्ट 1872 दी थाहर आए ते संसद दे दौनें सदनें थमां पास होए।

<><><><><><>

Jammu Terror Attacks

पिछले 96एं घैंटे थमां 5 टाकरे ते हमले जम्मू खित्ते च होए न, जिस च दऊं आतंकवादी मारे गे न। इक सीआरपीएफ जुआन शहीद ते 4 शैहरी बी कटुआ ते रियासी जिले च अपनी जान मुआई चुके दे न, जिसलै के केईं होरने जख्मी होई गे न। इलाके च 7 सुरक्षा बल कर्मी जिंदे च 5 जुआन, इक विशेष पुलस अफसर, इक पुलस कर्मी ते 42 शैहरी जख्मी होए न। सुरक्षा बले हीरानगर च भखे दे टाकरे च दऊं आतंकवादिएं जेहड़े जे भारी असले कन्नै लैस हे, गी मारी मकाया ऐ ते इक सीआरपीएफ कर्मी शहीद होई गेआ ऐ। जम्मू सांबा कटुआ रेंज दे पुलस दे उपमहानिदेशक ते कटुआ दे एसएसपी हुंदा कटुआ दे हीरानगर इलाके च किश घैंटे तगर चले दे टाकरे च मसा बचाह होआ। जम्मू जोन दे अतिरिक्त पुलस महानिदेशक आनंद जैन होरें जानकारी दित्ती जे दऊं आतंकवादिएं जिनें हाल च गै घुसपैठ कीती ही। जिला कटुआ दे हीरानगर दे सायदा सुकल ग्रां च इक घर च जाई बड़े ते पानी पलाने आस्तै आखेआ। उनें आखेआ जे जानकारी थ्होंदे गै एसएचओ ते एसडीवीओ दी टीम मौके पर पुज्जी गे। इक आतंकवादी गी कल संजा भखे दे टाकरे च मारी मकाया गेआ, जिसलै के दुए आतंकवादी गी कल मारी मकाया गेआ।

<><><><><><>

Rajouri-Reasi CASO

रियासी ते राजौरी जिले च घेराबंदी ते तलाशी अभियान यानि कासो खीरी 4 दिनें थमां चला'रदी ऐ जेहदे च सुरक्षाबल शिवखोड़ी बस हादसे दे पिच्छे जेहडे हमलावर न, उनेंगी तुप्पने दी कोश्ट च लग्गी दी ऐ। साढे आकाशवाणी दे जम्मू संवाददाता गुलशन रैणा हुंदी रिपोर्ट मूजब एह हादसा 9 जून गी होआ हा जेहदे च 7 यात्री मारे गे ते 43 जख्मी होए। इक जांच पडताल कीती गई ऐ जेहदे परेंत एह शेंका कीती जा'रदी ऐ जे 2-3 आतंकवादिं इस बस उप्पर हमला करने आस्तै ऑटोमैटिक थेआर इस्तेमाल कीते ते डरैवरे गी बुलेट दी फौहार कन्नै पैहले गै मारी सुट्टेआ ते आपुं राजारी जां रियासी दे जंगले च जाई छप्पे। जायंट कासो यानि तपाशी अभियान च फौज, पुलस ते सीआरपीएफ सुरक्षाकमी शामिल न, जेहडे घने जंगलें च घेरा पाइयै अभियान चला'रदे न। उआं अजे तोड़ी हमलावरें दा पता नेई लग्गा ऐ।



Poonch-Rajouri Forest Fires

राजौरी ते पुंछ जिलें च जंगली इलाकें च अग्ग लगने करी इनें जिलें च 3 थाहरें उप्पर बड़ी मती तबाही होई ऐ। साढे आकाशवाणी दे जम्मू संवाददाता गुलशन रैणा हुंदी रिपोर्ट मूजब राजौरी जिले दे कल्लड़ इलाके दे जंगलें च अग्ग लग्गी जेहदे करी केई एकड़ जंगलें च बूहटे ते झाड़ियां तबाह होई गेइयां। उआं गै कोटरका सब-डिवीजन दे घाट च ते एहदे कन्नै लगदे जंगलें च बी मंगलवार संजा अग्ग लग्गी गई। इत्थें बी मती तबाही होई। 5 दिने पैहले बी पुंछ दे मेंटर सब-डिवीजन च नार जंगली इलाके च अग्ग लग्गी, इत्थें बी बड़ी मती तबाही होई ते अग्ग गी अजे तगर साहलने दी कोशश कीती जा'रदी ऐ। मकामी लोकें दा आखना ऐ जे इस अग्ग करी केई जंगली जानवर मरी गे न ते एह हुनै तगर बी नेई बुज्जी ऐ। फायर ते अमरजेंसी सेवा विभाग इसी साहलने आस्तै हर संभव कोशश करा'रदा ऐ।



IMD

भारतीय मौसम विभाग नै उत्तर प्रदेश, पच्छिम बंगाल, बिहार ते झारखंड च अगले 3-4 दिनें तगर बड़ी जबरदस्त लूह चले दी दे असार दस्से न।

मौसम विभाग नै जम्मू कश्मीर दे जम्मू संभाग, उत्तराखंड, पंजाब, हरियाणा, चंडीगढ़, दिल्ली, मध्यप्रदेश, राजस्थान, हिमाचल प्रदेश ते ओडिशा च अगले त्रै-चार दिनें तोड़ी गर्मी दी लैहर बरकरार रौहने दी पेशगोई कीती ऐ। मैहकमे दा आखना ऐ जे दक्खन-पच्छमी मानसून दे होर अगड़े बघने कन्नै अगले 2-3 दिनें तगर ओडिशा दे किश हिस्सें, आंध्रप्रदेश दे समुंद्रै कन्नै लगदे इलाके ते उत्तर पच्छमी बंगाल दी खाड़ी दे इलाके च गर्मी थमां राहत थोई सकदी ऐ।

<><><><><><>

ICC World Cup

मर्दे दे आईसीसी टी-20 विश्व कप क्रिकेट दे कल रातीं न्यूयार्क दे नस्साउ काउंटी अंतर्राष्ट्रीय स्टेडियम च खेड्डे गेदे इक मैच च भारत नै अमरीका गी 7एं विकटें कन्नै हराई दित्ता। इस जित्त दे कन्नै गै भारत सुपर-8 च अपनी थाहर पक्की करी लैती ऐ। अज्ज इक चैंपियनशिप दे दऊं मैच खेड्डे जांगन। वेस्टइंडीज नै न्यूजीलैंड गी त्रिनिदाद दे ब्रायन लारा स्टेडियम च 13 रंजें कन्नै हराया। इस जित्त कन्नै वेस्टइंडीज बी सुपर-8 च शामिल होई गेआ। अज्ज दूआ मकाबला संजा किंगसटाउन च बंग्लादेश ते नीदरलैंड बश्कार होग।

<><><><><><>